



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :

f Tir Yimiyim

ig tir\_yimiyim

yt tir yimiyim

TAPAK 7

**Sarfraz Ahmed cricket asaya nungi anisungzüker**

**Iran-i Israel PM Netanyahu tepsettsü nangzüker**



VOL. XXIII ISSUE NO. 152 (ADOK 152) DIMAPUR TENTONÜ (MONDAY) METSÜREMI (MARCH) 16, 2026 ₹ 5.00

## Nagaland nung April 9 nü by-elections agitsü

**Dimapur, March 15, 2026 (Agencies):** Election Commission of India (ECI)-i state 6 kübok assembly constituency ti nung by-elections agitsü osang metetdaksüogo aser state tem rongnung Nagaland dena lir.

Iba by-elections ya shilem ana lemsar agitsü aser April 9, 2026 nü Goa, Karnataka, Nagaland o Tripura nung agitsü. Tanabuba shilemji April 23 nü Gujarat aser Maharashtra nung agitsü. Ajisüaka May 4 nü constituency ajak indang votes counting asütsü aser May 6 tashi nung election maparen ajak tembangtsü ta ECI-i metetdaksüogo.

Nagaland nung taoba minister Imkong L Imchen alima nungi pila aoba ajanga 28-Koridang (ST) assembly constituency nung by-election agitsü.

Mokokchung district kübok 28 Koridang Assembly constituency (ST) by-election nung vote enoktsür 22,390 lir.

Special Summary Revision (SSR) 2026 tembangba sülen March 13, 2026 nü iba

constituency atema final electoral roll sayaogo ta ketdangsurtemi ashi.

Vote enoktsür 22,390 nungi general electors 22,266 lir aser parnokji tebur 11,253 aser tetsür 11,013 lir. Maneni, service electors 124 lir aser parnokji tebur 123 aser tetsür ka lir ta ketdangsurtemi metetdaksüogo.

Koridang constituency nung by-election atema polling stations 30 asütsü.

Election Commission-i Goa, Karnataka, Nagaland aser Tripura polling atema March 16 nü gazette notification agütsütsü. Item constituency atema nominations agütsüba tatembang anogoji March 23 asütsü aser March 24 nü nominations reprangtsü.

Iba sülen candidate temi March 26 tashi nung tenüng meyipa agitsü akok aser April 9 nü polling asütsü.

Gujarat aser Maharashtra atema March 30 nü gazette notification agütsütsü aser April 6 tashi nung nominations asütsü ta ECI-i ashi.

## Mokokchung District nung MCC tenzüko

**Dimapur, March 15, 2026 (TYO):** Election Commission of India (ECI) ajanga 28-Koridang Assembly Constituency nung by-election agitsü osang metetdaksüba sülen Mokokchung District ajungalen "Model Code Of Conduct" tenzüko.

Iba osang ya Mokokchung Deputy Commissioner & District Election Officer Ajit Kumar Verma, IAS-i metetdaksüogo.

Model Code of Conduct kübok rallies, public meetings aser processions dena political maparen inyakba noktanger. Bangdakpur dang nungi temelaba meshir ang political sentongtem agitsü akok ta pai ashi.

Political mesüra candidate temi nüboyimba maparen asoshi sorkar gari, kiojen amala amshitsü memelar ta Mokokchung DC-isa metetdaksüogo.

28-Koridang AC nung candidate tem, sorkar office, department, rejutem, nija teloktem aser public-i Model Code of Conduct sülen anidaksü aser District Election ketdangpurtem den amaliteptsü metetdaksür ta paisa ashi.

Iba dak sendakba nung kari dangi ozüng alema inyaksangshir Election Laws nung lateta aliba ama temerenshi alitsü ta Mokokchung DC-isa metetdaksüogo.

## Assam nung April 9 nü assembly elections agitsü

**Guwahati, March 15, 2026 (Agencies):** Election Commission of India (ECI)-i Assam, Tamil Nadu, West Bengal, Kerala aser Union Territory of Puducherry nung 2026 Legislative Assembly elections agitsü osang metetdaksüogo.

Chief Election Commissioner Gyanesh Kumar-i March 15, 2026 nü New Delhi nung osangbener senden ka nung Assam, Kerala aser Puducherry nung April 9 nü single-phase election agitsü ta ashi.

Iba sülen Tamil Nadu nung April 23 aser West Bengal nung

April 23 aser April 29 anogotem shilem ana lemsar polling asütsü ta pai ashi.

March 11, 2026 nü ECI-i meyipa reprangshiba senden ka amendang ketdangsurtemi phase-wise polling plan indang sentong renema liasü.

"Democracy ajak nung electoral rolls shitak ayuba nung ajemdaka lir. Constitution nung Article 326 kübok Special Intensive Revision (SIR) agiogo aser iba ya vote enoktsütsüpur ka danga mezüngdoktsü aser vote meinoktsütsüpur agientsü atema inyakogo" ta CEC Kumar-i ashi.

## Western Naga Youth Front telungjem tentetogo



**Dimapur, Mar.15 (TYO):** Tawa akümba district tasen Chümoukedima aser Niuland district na makümdang, Dimapur district ta ser aliba tesem nung alir Naga lanurtem ajak ayimbanga anüktsü aser anepalutsü atema Naga nunger lanur telungjem tentet tasen ka tenüng agi "Western Naga Youth Front (WNYF)" tentetogo.

Iba lokti tentettsü asoshi taoba küm ka dak tali Dimapur nung alir Naga nunger lanurtem rongnung jembitepa arur, yashi Küptoknü, Senden Riju Dimapur nung sentong tajung ka lia iba

lokti tentetba alima nem metetdaksüogo.

Iba Naga lanurtem telungjem tenzüksüsa nüngdaka akümba indang ashidang, "Naga nunger yimten nüchiso bushir telok aika kümogo saka parnokji teyari agütsütsü melen Naga nunger lanurtem peisasa rongsen tsükteta inyaksü merangertem nemang timtem agütsür, iba ama tensa mapang ka agi iba ama Naga lanur telungjem ka alitsü nüngdaka aküm," ta iba lanur telongjem tentettsü shimtsüba lanur lenir Wb.Tia Longchari metetdaksü. Iba telongjem

akümtsüba ya 2024 küm nungi tenzüker aser Naga nunger kin aser lokti 19 tashi agi temoatsü aser tashi agüja iba WNYF ya tenzüko ta paisa metetdaksü.

Iba kasa senden nungsa, tang nungi WNYF anir aotsü atema shimtetba tir, Wb.

Aga Rengma-i jembidang, iba telungjem ya Naga nunger lanurtem ajak sabang ka nung lungjema alitsü tangatetba aser teimla nung tentet, anungji iba nükjidong tongteta, talisa, Naga nunger lanurtem ajanzüksüsa inyaksü merangtsü ta metetdaksü.

(Maneni tapak 2 nung...)

## NFHRCC-i NPWD, Road & Bridges o jangjashitsür

**Dimapur, March 15, 2026 (TYO):** Nagaland Foothills Road Coordination Committee (NFHRCC)-i tawa Nagaland Public Works Department (Roads and Bridges) ajanga Foothills Road dak sendakba sangdong ka agütsüba nung onük kar jangjashitsüogo aser Department dang nübortem ola menembangtsü metetdaksüogo.

Naga kin hoho 10-i nungita NFHRCC-i 2013 nungi Foothills Road maparen tenzüka liasü aser iba ya Chief Minister Dr. N Rio kübok NPWD, Road & Bridge-i meteta dang tenzüker. Iba sülen NZPO, Kuki Inpi, Nagaland, Tikhir Union aser Western Chakhesang Hoho-i NFHRCC nung adenba ajanga Nagaland nung kin 14 aküm ta NFHRCC-i ashi.

Foothills Road ya Tizit nungi Dimapur tashi sendakteptsü nükjidong nung tenzüker aser public-i sorkar dang gari senzütetba lenmang ka kua ta külemi ola adok.

"Onok nem lenmang agütsüra onoki ali angati agütsütsü aser NNPGs nungia tax kecha mesarutsü" ta nübortem ashi. Iba nung ajemdaker 2013 küm pei pei kin hohotemi ali kiburtem dang nungi NOC benden aser Chief Minister-i mepishiba ama 2018 küm pa ket nung Original NOC agütsü ta The Media Cell, NFHRCC-i sangdong ka nung ashi.

Iba sülen Dr. N. Rio lenisüba kübok State sorkari 2018 küm iba

lenmang dang Trans Nagaland Highway ta jaloktsü aser Peren District kübok Khelma tashi asütsü ajungket.

Nagaland nung alirtemi sorkar dang 2 Lane Road connectivity meshi aser iba atema ali asoshi temenok kecha magii feet 40 angati tenlaogo. Anungji sorkari rongsen lenmang bushia nübortem nüngdakba lenmang yanglutsütsüla ta parnokji ashi.

Phase 1 asoshi contractor shimba nung department-ibo political meinprong kecha maliasü ta ashir saka 40 Bhandari Assembly Constituency nungi MLA-i yimjak nung aser Lotha Hoho dangi shidi züluba nung pai Baghty Division nung M/S JK Constructions aser M/S Chabou & Co nem mapa lezmüksütsü ta shiogo.

State sorkari mapang shitak nung senotsü magütsütet nunga contractor anati parnok sen amshia yanglua atatsü pai jembitepa ta 40 Bhandari AC nungi MLA-i shiogo.

Khelma tashi 2 lane foothills road project nung SASCI Loan Scheme 2nd Phase atema sorkar nungi administrative approval agiogo aser 2027 nung lenmang ajunga black topping asütsü jembio. Ajisüaka, SASCI Scheme ya performance based LOAN scheme ka asünung bangdak Department-i 2nd Phase Work Orders agütsütsü menuba atema kulitem agütsütsü melena parnokji tenangzüker kecha mali ta

ashiba ya Nagaland nung alirtem ashiochtsüba mapa ka lir ta NFHRCC-isa metetdaksüogo.

Phase 1 kübok Rs 148.5 crore alang Work Orders 17 agütsüogo aser iba ya ita 12 atema agütsüba December 2025 nung tembangogo.

Ajisüaka Department-i kuli kar nung ajemdaker March 31, 2026 tashi mapang atsülang anungji bangdak Department-i nübortem meratadaksütsü ayongzüker ta NFHRCC-isa ashi.

Foothills Road yanglutsü atema Dr. N. Rio lenisüba kübok 2013-14 nung SPA fund kübok Rs. 70 crores shi agütsü aser iba ya 90/10 Central-State tangatetba nung liasü.

2021- 2022 nunga Public-i akhangba agizüka Chief Minister-i state senpong nungi Rs. 30 crores lezmüksü. Ano, SASCI soft Loan scheme kübok küm 50 atema Rs. 148.5 crores lezmüksüogo. Anungji NPWD, Road and Bridges-i state senpong nungi Rs. 245.5 crores agütsü ta ashibaji tiyazü lir ta NFHRCC-i jangjatsüogo.

NFHRCC aser kin hohotem indang nükjidongji Tizit nungi Khelma tashi iba otsütsütsü lenmang yanglutsü atema State sorkartem tashi itdaksütsü atema lir. Onok indang nükjidongji tashi balala nungi Contractor firms-i inyakba mapatem tax nungi kümzüka ayutsü atema lir ta The Media Cell, NFHRCC-isa metetdaksüogo.

# Khezhakeno nung Multi-Playground Kalakha semzükogo



Khezhakeno nung Multi-Playground Kalakha semzükba mapang tangokba noksa ka yangi angur.

**Dimapur, Metsüremi/March 15 (TYO):** Advisor, Youth Resources & Sports, S. Keoshu Yimchunger-i March 14, 2026 nü Khezhakeno nung Multi-Playground, Kalakha semzükja liasü.

Iba tesem semzükba sentong ya Tsodelo Taza-o nung agia liasü, kong Chairman, NSSB aser Chief Patron & Pioneer, Multi-Playground, Kevekha Kevin Zehol, NCS (Retd.) ajanga June 25, 2022 nung football ground tasen ka bushitsü atema pa nem nungloksüba indang otsü ashi aser tesem peria maliba ajanga Khezhakeno nung aliba football ground tuluba mekumtet ta ashi.

Iba multi-playground atema peria ali angati agütsüsü asoshi Komuno Khel, Khezhakeno ajanga December 3, 2023 nü pangzüing ka renema iba playground yangluba nung nungdakba ali peria agütsüba atema Zehol-i pelaba lemsatepa liasü.

Yamaji April 1, 2024 nü nungi ali aon tenzük.

Iba multi-playground

yanglutsü atema Nagaland Angh-i sen 2,50,000 agütsü, Pfukrulhou Koza, Jt. Dir. (Retd.)-i sen 2,50,000, Dr. Ngopelo Keviechu-i sen 10,000, Dr. Collins Sono-i sen 5,000, Viepelu Pulo-i sen 3,000 aser Mechanical Department ajanga excavators aser bulldozers agütsü ta Zehol-i ashi.

Advisor, Keoshu Yimchunger-i iba sentong nung jembidang Kevekha Kevin Zehol nem tenüngsang agüja liasü aser iba tesem nung ano basketball court, badminton court aser ano football ground ka yanglutsü mangdang aliba asoshi pelaba lemsatep.

Tang yangi standard size football ground ka yanglua lir asünung, sorkari yaria futsal ground ka yanglutsü merangtsü, ta ashi.

Advisor Keoshu-i yimtsüing putu menden, arogo, kaketshir aser lanurtem densema lokti tentet balala dang iba ground anepalutsü ayongzüka liasü.

Kechiserna ajak sorkar dak kisüing metaloka malitsüla aser

item ki o jen yanglushiba maparen nüburtemi inyaktsüla, ta pai ashi.

Sorkar indang ki o jen nung kibur akumtsü Naga nungter dak yimya mali, anungji sorkar indang ki o jen ya pei indang ama anepalua amshitsüla aser yanglushiba aser tajungba kumdahtsüba nung nüburtemi inyaktsüla, ta ashi.

Pai lanurtem dang mapang ka-ka nung kisüing masayar küm tepiyong saisapong balala asayatsü ajungmesoa liasü aser yimtsüing ketdangsurtem dang sempet tajung aliba lanurtem jangjateta State Khelo academy nung oa adentsü asoshi ajungshitsü shia liasü.

Iba sentong nung MLA Pongshi, former MLA Khriehu Liezietsu, NCSU aser NAPO tir Pele Khezhie, Pfukrulhou Koza, Jt. Dir (Retd), KaksheZhimomi, Dy. Director, Tourism, Er. Daniel Kevie, E.E., Pfutsero, PWD (R&B), Vekhrolo, BDO, Pfutsero aser Mechietsho Koza, EAC, Phek nungtertem dena liasü.

# Minority Students' Union DGC Freshers Meet amung

**Dimapur, Metsüremi/March 15 (TYO):** Minority Students' Union of Dimapur Government College (MSU-DGC) 6 buba Freshers Meet sentong March 14, 2026 nü college auditorium nung agia kaketshir batch tasenpur pela agizüka liasü.

Iba sentong nung Linguistic Minority Forum of Nagaland indang chairman aser Minority Wing, Naga People's Front indang tir Bishnu Bhattacharjee tongti o jembir ama aden.

B h a t t a c h a r j e e - i kaketshirtem dang pei azüingba nung rangloksü aser pei nükjidong tongtettsüsa meranga inyaktsü ajungshia liasü.

Pai skill development, sports aser music ya kanga tongtipang kumogo ta ashi aser lanurtem

ajangzüksü asoshi sorkar inyakyim tasen indang pai lemsatepa liasü.

Paisa state nung kaketshir terenlok asoshi tanen makai meranga inyakba atema Chief Minister Neiphu Rio aser Minister, Higher Education & Tourism, Temjen Imna Along dang pelaba metetdaksü.

Iba sentong tenzükba MSU-DGC tir Sumith Sengyungsa-i pela agizükba jembia liasü.

Sentong akhumdong ka ama Dayashankar Pandey, Hatokhajan High School, Assam aden aser tetushi tesemdangertem ama Ajay Sethi, managing director, NITI Academy aser Pratik Dutta, administrator, St. Mary Higher Secondary School dena liasü.

# Nagaland Angh Nand Kishore Yadav-i Khonoma semdang



**Dimapur, Metsüremi/March 15 (TYO):** Nagaland Angh Nand Kishore Yadav den par kinunger temi March 14, 2026 nü Khonoma Village semdanga liasü.

Iba mapang Angh ya Minister, Women Resources Development and Horticulture, Salhoutuonuo Kruse aser Lokayukta Nagaland, Nino Iralu aser yimtsüing nung lenir aser ketdangsurtemi agizüka liasü.

Iba mapang Angh-i yimtsüing

aser nübur lenirtem den sensaksema liasü aser Khonoma yimtsüing nung aliba nüburtemi sobaliba tajung wazüka ayuba asoshi tenüngsang agüja liasü.

Libajen wazüka ayuba aser libajen meraksai takum alitsü mera agiba aoshia pai tenüngsang agütsü.

Iba mapang Angh aser par kinunger temi sobaliba, yimsü-yimbong aser yimtsüing tebour ajungba ngua liasü.

# WENN ajanga tetsür entrepreneurs atema workshop ayongzük



**Dimapur, Metsüremi/March 15 (TYO):** Women Entrepreneurs Network Nagaland ajanga Small Industries Development Bank of India (SIDBI) den lungjem tetsür entrepreneurs aser entrepreneurs kumner asoshi Capacity Building Workshop ka MTBA Conference Hall, Mokochung Town nung March 13, 2026 nü ayongzüka liasü.

Tetsürtem indang entrepreneurial skills aser

shisatsü ulushidaktsütsü nükjidong nung product tajungba kumdahtsüba, jenjang, packaging, marketing, accounting aser documentation amala nung rangloka liasü. Iba sentong yagi entrepreneurs tem local aser tuluba markets tem nung toktepba nung yaria liasü.

Iba workshop nung shisalen sayur Rongsenmongla Jamir, founder, Mixpick Enterprise Nagaland ajanga oset jenjang, packaging aser marketing indang nung jembia,

NengneithemHengna, founder, Runway Nagaland ajanga enterprise aser product development indang jembia aser Alemjungla Jamir, founder, Naga Bowl Express ajanga accounting aser documentation onük nung jembia liasü.

Iba sentong nung shilem agirtemi parnok business tashi itshtitsü asoshi tangazükba jenti ngua liasü aser iba workshop ya tetsür entrepreneurs atema networking aser tajangshiba lemsatepa sapang ka ama liasü.

# Western Naga Youth... (TAPAK 1 NUNGI...)

Iba sentong temer külen, osangbenertemi iba WNYF nung Western Sumi Youth Front aser Chakhroma Youth Organisation madenba kuli asüingdang dang, " iba telungjem tenzüksü jembidangbo parnok ajak dena jembio saka parnok kintem tsüingda tamalen terenemba ka aliba agi tangji parnok medenteter, saka tesülenbo arua adentsü imlar, parnok asoshi teti WNYF kishi lapoka dang lir", ta Aga Rengmaisa metetdaksü.

"WNYF tentetba ya kecha tanga politics asayatsü tebilemba aser nükjidong mali saka Naga nungter lanurtem ajungkettsü asoshi tentetba lir," ta Aga Rengma-isa ashi. "Onoki ali merakteper saka

Chümoukedima, Niuland aser Dimapur district-tem ya Naga nungter ajak meyong lir, anungji item tesemtem nung aliba Naga nungter lanurtem ajak asoshi inyaktsübaji WNYF-i khurtetsa bilemer," ta paisa ashi.

Tang nungi WNYF lenitsü atema shimertemji Tir Aga Rengma, Tatong tir Neisapa Soho, Repsem zülur Imtirong Amri, Grievances Cell Ketdangser Nukuzo Dozo, Senotsü Ketdangsertem Rankathung Ezung aser Temsummeren Jamir, Social & Cultural Ketdangsertem Aso M. Imsong aser Kiheukigumbe Riame, Press & Media Ketdangser Illiegonbe Miliang aser Lea aser Kimen Achumthung Tsopoe nungtertem lir.

SCHEDULE FOR KERALA (All 140 Assembly Constituencies)

Poll Events	Date and Day
Date of Issue of Gazette Notification	16.03.2026 (Monday)
Last Date for making Nominations	23.03.2026 (Monday)
Date for the scrutiny of Nominations	24.03.2026 (Tuesday)
Last date for the withdrawal of candidatures	26.03.2026 (Thursday)
Date of Poll	09.04.2026 (Thursday)
Date of Counting	04.05.2026 (Monday)
Date before which election shall be completed	06.05.2026 (Wednesday)



March 15, 2026 nü New Delhi nung osangbenertem senden ka nung Chief Election Commissioner, Gyanesh Kumar den Election Commissioners S S Sandhu aser Vivek Joshi nungeri jembidang tangokba noksa nung angur. EC-i West Bengal, Tamil Nadu, Kerala, Assam aser Puducherry nung assembly election agitsü anogotem sangdongogo.

EC-i assembly constituency 8 atema by election anogo sangdong

New Delhi, Metsüremi/ March 15 (Agencies):

Amongnü Election Commission-isa, Commission-i state trok- Goa, Gujarat, Karnataka, Maharashtra, Nagaland aser Tripura state tem nung assembly constituency 8 nung by election agitsü atema anogotem sangdongogo.

23 nü election agitsü, ta metetdaksü.

Election Commission-isa, constituency 8 nung election agiba sülen May 4 nü vote azüngtsü aser state pezü- West Bengal, Assam, Kerala, Tamil Nadu den Union Territory Puducherry nungbo kasa anogo nungjisa osang sangdongtsü.

New Delhi nung osangbenertem senden nung jembidang chief election commissioner Gyanesh Kumar-i, Goa, Karnataka, Nagaland aser Tripura nung aliba assembly constituencies nung April 9 nü election agitsü aser Gujarat o Maharashtra na nung aliba constituencies nung April

Kümsük metembangdangsa menden tazüng aliba atema tatartem shimtsü asoshi by-elections ayongzüka agir.

MLA kar menden nungi anenba, kar menden nungi anendaktsüba mesüra teinyakdakpur kar süadokba kulitem ajanga item menden azüngteta liasü.

EC-i state 4 aser UT ka nung election agitsü anogotem sangdong

New Delhi, Metsüremi/ March 15 (Agencies):

March 15 nü Election Commission of India-i, Kerala, Assam, Tamil Nadu, West Bengal state tem aser Puducherry UT nung assembly elections April 9 nungi April 29 tsüngda agitsü, ta metetdaksüogo.

Osangbenertem senden ka nung Chief Election Commissioner, Gyanesh Kumar-i, Kerala, Assam aser Puducherry nungbo kenüyongi dang April 9 nü election agitsü aser May 4 nü vote zünga osang sangdongtsü, ta metetdaksü.

West Bengal nungbo shilem ana küma lemsar April 23 aser April 29 na nung assembly election agitsü aser May 4 nü osang sangdongtsü; Tamil Nadu nung April 23 nü election agitsü aser May 4 nü osang sangdongtsü.

CEC Kumar-i, West Bengal, Assam, Tamil Nadu, Kerala

as er Puducherry nung voters crore 17.4-i vote agütsütsü, ta metetdaksü.

Kumar-i, "Elections agiba ya ajanga election sobaliba takar temaitsü sayur aser iba ya ajanga asen linük nung telongjem aliba aser nisung tapu aika tesünep nung litetba sayur. Iba election nung voters crore 17.4-i vote agütsütsü. Iba election benjung reprangtsü atema linük 20 dak tema nungi electoral commission ketdangsertem arutsü," ta metetdaksü.

Paisa, electoral roll merüktetba ya asen democracy tamendakdak lir, vote agütsütsü temsüa alir shinga mezüngdoktsüla aser temsüa malir shinga mezüngoktsüla, ta metetdaksü.

CEC Kumar-isa, "Election Commission-i election agitsü aliba states ajak semdangogo. Semdangba mapang nung

commission-i recognised parties ajuruogo aser parnok tebilemba onüktem agizükogo. Iba dak alia commission-i district electoral officers, SP aser ozüng benokba agency balala nungi nodal officers ajuruogo. Commission-i BLOs nem tetushi agütsüogo," ta metetdaksü.

Item state nung election agitsü jakdang electoral roll merüktettsü atema ECI-i Special Intensive Revision (SIR) exercise agiogo.

SIR exercise agiba mapang opposition party aikati iba inyakyim anema court nung ken o benoka liasü aser West Bengal nungbo Booth Level Officers (BLOs) amokmerenba atema Supreme Court nung tashishiba ken o agüja liasü.

Iba sülen SC-i ECI dang BLOs amokmerenba osangtemji tekeraba nung court nem metetdakang, ta tuyua liasü.

Iran nungi India nunger 70 kümzüka anir aruogo



March 15, 2026 anepdang Iran nungi tayimtsü ajanga arur India nunger kaketshirtem Indira Gandhi International Airport tonga arudang tangokba noksa nung angur.

New Delhi, March 15 (Agencies):

Tesüiba hopta ana tashi Iran nungi anir maruteti aliba India nunger 70 bo Amongnü anepdang Delhi tonga anir aruogo.

India nungertemji Iran nungi anitetba sülen Armenia ajanga special commercial tayimtsü ka nung anir ari. Tayimtsüji Honibar nikongdang Yerevan airport nungi apusoa liasü.

India nunger kaketshir 70 ji parnok teimbaka Jammu & Kashmir nungi liasü aser karbo temeshi ainlen jajaritem liasü.

Yerevan airport nungi tayimtsü apusoba sülen Dubai nung tatsüka anenzük, iba sülen Amongnü anepdang New Delhi tonga anir au.

Parnok Delhi tonga aruba sülen Jammu & Kashmir sorkari achaayangtsüba special bus kar nung J&K-i anir ao aser karbo tayimtsü ajanga Srinagar-i anir ao.

Iba dak alia ano tayimtsü ka ajanga India nunger kaketshirtem aser temeshi ainlen jajar nisung 60 shi Amongnü aonung Delhi tonga anir aruogo.

Taruba anogo ishika tsüngda maneni India nungertem aika anir arutsü.

Iran nung rara adokba sülen India nunger 9,000 shi Iran nungi maruteti liasü. Parnok teimbaka Jammu & Kashmir nungi lir aser tanüngba India nungertemji Uttar Pradesh densema state balala nungi lir.

India nungertemji teimbaka Iran yimtiba Tehran aser

Tehran nungi kilometer 150 pilar aliba Qom yimti na nung liasü.

Jammu & Kashmir Students Association national convenor, Nasir Khuehami-i, "Parnok kinüngertem aika kanga shisabulua liasü, ajüsüaka parnok anir aruba ajanga kinüngertem melung anisüngzükogo," ta metetdaksü.

Paisa India nungertem anir aruba atema Ministry of External Affairs (MEA) aser Tehran nung aliba Indian embassy nung ketdangsertem dang pelaba metetdaksü.

United States aser Israel nati senteper Iran amak tranzüka mapang nungi India sorkari Iran nungi sensotem anir arutsü atema asalentong yanglu tenzüka liasü.

Iran nungi meyipa aruner India nungertem tamasa gari lenmang ajanga Armenia aser Turkmenistan nati anir aoba sülen iba nungjagi tayimtsü ajanga India-i anir aru.

India nunger kaketshirtem karbo Armenian arrtsü adenba sülen transit visas menguteti liasü, ajüsüaka Tehran aser Yerevan na nung aliba Indian embassies teyaritap ajanga item tetsükdaktsü ajak koktet.

Iran nungi kümzüka anir aruba India nunger kaketshirtemji aika Iran tesem balala nung aliba universities nung azüngertem lir. Item universities rongnung Urmia University of Medical Sciences aser Tehran University of Medical Sciences na densema lir.

Nepal nung temeshi ainlen jajar India nunger 7 tsükseta asü

New Delhi, March 15 (Agencies):

Honibar aonung Nepal kübok Gorkha District nung India nunger temeshi ainlen jajaritem telok kati Manakamana Temple semdangba sülen meyipa aoba mapang nung gari lendong nung aika tsükseta asü.

Gorkha nung DSP, Raj Kumar Shrestha-i, "Sahid

Lakhan Rural Municipality kübok Kanter area nung gari ajuchir lenküboklen lua tsükokba lendong nung temeshi ainlen jajar nisung tenet yirua Chitwan district nung aliba Chitwan Medical College-i anir oa yari, ajüsüaka parnok ajak meküzmükteti asü," ta metetdaksü.

Lendong atalokba mapang

mini bus nungji nisung 10 dak tali liasü.

Yaküm August ita nunga Nepal kübok Anbukhaireni nunga India nunger telok ka gari lendong ajurua nisung 27 asü.

Tesüiba küm ishika tsüngda Nepal nung gari tali bulua senzüteper; yamaji gari lendonga kanga bulua ataloker, ta police-i metetdaksü.



March 15, 2026 nü Jaipur nung LPG Gas cylinders melentsü atema tarensena yua aliba noksa nung angur.



## TIR YIMYIM YIMOBILEM (EDITRIAL)

DIMAPUR MONDAY, FEBRUARY (METSUREMI) 16, 2026

### Lungjemtsü Melungjemteter

**N**agaland nung alir Naga nunger asoshi nokdang, blockage, akhiyaa aotsü tasaktibaji lungjemtsü asoshi melungjemdaksüba nokdang ya asütsü. Aji oda, telungjembo Naga nungertemisa taginüba, iba jagi telok-telok balala lemsaa aliba telok nung lenirtem ajaki Naga nunger lungjema alitsü nüngdakba indang jembir, ajisüaka kodang shitakba lungjemtsüba indang jembidir, telok karbo telungjem nung medentettsüsa tebilemstü onük adoker, anungji melungjemteter. Ibaji dang masü saka telungjembo ajaki lungjemner saka telok kari mesüra kin kari kar adenba telungjem nung medener, iba jagi Naga nunger lungjemtsüba ya mapa tasakba-tasakba kümadoker. Aji oda, Naga nungertem dak Naga nunger ya kibong ka chir ama ka küma lungjemtsü tangatetba aser shisatsü alinungbo, melamelaa lungjemettsüba ser nung melongjemnüba agi telungjem nung medener ama sayuba mapa kaji, tang Dimapur aser temeket nung alir Naga nunger lanurtem lungjemer yariteptsü asoshi tentetba telungjem Western Naga Youth Front nung Naga kin kari adentsü memulungbaji asütsü. Nagaland nung Naga nunger asoshi mapa adokdak aser rongsen moludak temoatsü limaji Dimapur ya lir Ajisüaka, Dimapur ajanga Tsüngremi agütsüba temoatsü aser maongkaji Naga nungertemi magiteter. Ibaji Naga nungertemi tsümartem den toktepba shishilembaba mapatem meinyaktetba dang masü saka Naga nungertemi Naga nungertem nem timtem agütsüba ajanga lir. Aji oda, Dimapur nung Naga nunger lanur kati business tilaka tenzüka lapoka ngura, yangji Naga nunger yimten nüchiso bushiba tenüng nung telok balalai saru meshir aser magütsüra pua bener aoer aser amokmerener, anungji item timtem aser tetsübuji Naga nunger lanurtem aikati metizükteti business mapaji anena adoker. Itemji state government-i menoktangteter, anungji nübortem lungjemer noktangtsüsa akümer. Tanü Dimapur nung Naga nunger lanur telungjem, WNYF, tenzüksüsa akümbajia Naga nungeri Naga nunger lanur business inyaker pua bener oa timtemdaksüba maremtet, Naga lanurtem ka küma lungjemer item tamashi aser tetsübuttsü mapatemji nokdangtsü asoshi pei taküm agi tendanga lungjema telungjem ka lir. Atangji, iba ama tetsübuttsü aser takoksa agütsüba mapatem noktangtsü asoshi lungjemer nokdaksüsa akümba dang ashi, joko tangbo WNYF mapaji Naga lanurtem rongnung Dimapur nung business inyaksü asoshi kati ka dang lenmang sayutepba shisalemsateptsü aser yariteptsü asoshi tenteter asütsü. Aji oda, Naga nungertemi Naga nunger tsübudakja timtemdaksüba mapajibo yakta anenadoktsü, saka Dimapur nung tsümartemi inyaka aliba mapatem Naga lanurtemi melenzüka inyaksübajiang mapang agitsü. Iba atemaji Naga nunger mapa inyaksü meteter renema atatsüla. Aji oda, tanga business mapa tuluji yutsür, inyakdi serbo tanga inyaktetba mapatem rongnung auto rickshaw, khu abenba gari tila pick up gari aser local taxi anitsüba mapatem ya asütsü. Itemji danga, Naga nunger lanurtemi anitet nungbo, kenü nung Naga nunger lanurtem meyirijang dak tali mapa angutsü. Iba denji ano Dimapur Railway station nung süngo moluba aser chiyongba dokanungi tenzüker ki aoker aser railway nung mapa tapu balala nung Dimapur Railway station asünungji, tsümartem melena Naga nunger lanurtemi inyak nungbo, yangji Naga nunger lanur aika mapai itettsü. Itemji bushitsü aser reprangteta tagitsü küma inyaksütsüba jagi telok telungjem tajung ka nüngdaker aser ibaji tang tentetba WNYF ama telok ya asütsü. Parnoki item mapatemji reprangdanga asadangtsü aser shirnok den jembitsülar, parnok nemji tezüluba nung agüja Naga lanurtem ajangzükdaksütsü asoshi inyaksü. Atangji, asenok telungjem dang lungjemteter, iba telungjem tashiji government tashi danga tuluba asütsü, anungji iba telok jaging shisatsü nunga aser nübo agia government yaritsü. Iba ama telungjem nung medennübjibo, atangji, Naga nunger asoshi shisabolutsüka lir.

## OLEMSABANG

### SEN TETEMLOK AGI APOSHIA AMSHIBA TAJANGZÜK ASER TAKOKSA

~ L. Kika Pongener

Tanü putu nung, asen lima nung, sen sentem/tetemlok agi aposhia amshiba ya kanga bulua kümogo. Iba ya sen bushiba luyim (Business) kanga tongtipang ka kümogo. Telok aser nija aikati sen tetemlok (Interest) noklang nung 5 % aser karibo 10 % tashi agia aposhia amshiba angazüker. Angazükba agi Govt.-ibo sen tetemlok (Interest)-ji 3 % dak tali agibo magitsüla ta temzüng lateta kar ta angazük. Aji oda, kibong karbo sen tetemlok agi aposhia amshiba tajangzük agi kibong takar küma alir-a alitsü akok. Ano lokti-tentet karbo sen tetemlok agi aposhia amshiba agi tajangzük ngua, züngsemtem mapang shia tajangzük lema agiba-a alitsü akok. Lokti-tentet karbo sen sentem/tetemlok agi aposhia amshitsüba nukjidong nung telok tenung jateta tentetba-a telok karbo alitsü akok. Anungji iba sen sentem/tetemlok agi aposhia amshiba mapa yagi sen apotsür kibur aser sen apoa amshr anapronglaji tajangzük angur....ta ashitsü akok.

Sen sentem/tetemlok agi aposhia amshiba yagi nija aser kibongtem tajangzük anguba kar reprangdangdi.... Nija aser kibong karbo sen sentem/tetemlok agi apoba agi timtem tulu nungi kümzükba-a lir....Nija aser kibong karbo temang nung tashitak tulu keter mozüki tajungi onur sernung maka-maitba agi mooteti aliba; sen sentem/tetemlok agi apo'er taneptsü bushia mozü ki tajungi aoba-a lir. Ano nija aser kibong karbo chirnur shisaliok (Education) bushiba luyim ung teyari tulu anguba-a lir. Ano kibong karbo jala-jabaso sadi benjong atema teyari tulu ngua amshiba-a lir. Ano lim arogo kar nungbo sen tetemlok agi aposhia amshia alitsü akok....Mesura ibala mesukba tasa aser lenmang balala agi sen lemsa-a amshia alitsü akok. Anungji sen sentem/tetemlok agi aposhia amshiba yagi kija aser kibongtem nem tajangzük tuluba asü (?) Mesura takoksa tuluba agutsür (?) Ibaji kanga junga medemdanga shisadangtsüla.

Sen sentem/tetemlok keter apotepa amshiba agi takoksa anguba kar reprangdangdi....Sen tetemlok keter apotepa amshiba yagi karbo adianu, pur-medemer, tembar aser yimtsür-yimer tsüngda nung mepelatepi pilaba-a lir. Ano karbo sen apotepba agi yimden bangdak sabang nung ken o (Case) agitepba; sorkar obendangdak sabang (Court) nung ken o benokba; linuk tenzüker 'Faction' balala nem ken o angadangtsü agutsüba-a angazüka aruogo. Ano kibong karbo apuani tsüngda miimshitepa sen apoba agi kibong balatsüsa akümba-a denjia aruogo. Ano karbo sen apoba agi sentsüh tulu kümadoker; iba sentsüh mechi adianu, senmanger aser pei apuani-ia dena kecha khuret mabentsü ta osangkaket nung sangdongba aser senmanger-ia dena jentokba-a denjia aruogo. Aji oda, nija aser teloki sen apotepa amshiba nung; sen tetemlok 'Percentage' (%) tali agiba aser tetemlok agi sentong akümba; iba amala jagi kibong karbo kimong-lumong, senti-rongsen takaba ajak lilemer; tatem nung ki aser kimong dena sentsüh-yong agiadokba-a denjia aruogo. Ano kibong karbo sen apoba sentsüh onsara kümadoker; kong ali'ar memettdaksüi jenshia senzüba-a denjia arugo.

Ajioda, nijai suaka, lokti-i suaka, shirnoki sen sentem/tetemlok agi aposhia amshir....Parnok jagi nubur akoksatsüsa masü; saka nubur ajangzüktsüsa amshitsü tongtipangba sudaktsütsüla. Tatishitsü ka....Nisung kati sen apotsür kibur ka dang sen apoba; jokorla, pai sentem (Interest) agutsüba jagi sentong (Principle) dang nungi kanga talila agujadoker; saka ano techanu (interest) agi tetsüdi (Principle) kümdaktsür; temeim mesayui tamakhangtsü khanga meshiba agi; takaba rongsen ajunga lilemba; iba ama tim dak alaka, tali-tapong taochi maket inyakba ajanga, nisung tsüngda nung tsükchitep adener; nubur rongnung mepetmesu atoker aser lokti nung telemsa atoker.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Maharashtra nung Arogoi anti-conversion ozüng anemer



Mumbai nung Khristan telok kati Maharashtra nung anti conversion Bill anema longkak aitba noksa nung angur.

**March 15, 2026:** Maharashtra nung Arogo nung lenirtem aser lokti tentet kari state cabinet nung anti conversion bill ka agizükba anema ola adoker.

Arogo nung lenirtemi, iba ozüngji agizüka benokra ibaji ajanga tamangba yimsü temeden nokdangtsü aser reshikangshiba hadir ka ama amshitsüa akok, ta metetdaksü.

March 10, 2026 nü Bombay Archdiocese-i sangdong ka ajanga, anti conversion draft ozüngji ajanga nija ka yimsü temeden nokdangtsü, ta metetdaksü.

Taoba hopta (March 5) BJP-i aniba state sorkari Anti Conversion Bill 2026 agizükba sülen anogo pongu lir state yimtiba, Mumbai nung amenoka aliba archdiocese-i iba bill dak sendakba nung telangzüba agütsü.

Iba bill ya ozüng akümtsü atema maneni state assembly nung benoktsü, iba sülen linük Tiria agizüktsüsa akümtsü.

Iba bill ajanga nisung ka tamangba yimsü agizüktsü atema anogo 60 jelia sorkar ketdangsertem nem metetdaksütsü nungdaker. Ibaji anogo 60 tsüngda kinüngertemi tashishiba agütsütsü atema lir.

Iba bill ya agizüka ozüng kümra aibelenertem küm tenet

tashi tepuokdak ayutsü aser senchi

500,000 rupees (US dollar 5,436) tashi achitsüa akok.

Archdiocese-i, yimsü meyiptsü atema anogo 60 jelia notice agütsütsü lemzüksübjaji khuret ka lir, aser iba ya nija ka yimsü temeden anema lir, ta ashi.

Arogoisa, "Nisung kati pei melung nung telemtetba agiba ama yimsü melentsü atema sorkar dang nungi temelaba meshitsü menüngdak. Iba dak alia kinüngertem nem tashishiba agütsütsü atema temelaba agütsübjaji yimsü temeden ilatsüba lir," ta metetdaksü.

Arogoisa sorkar dang iba bill nung tashishitsü aliba Arlratem reprangshitsüla, ta mepishi.

Iba ozüng ya agizükra India nung anti conversion ozüng agizükba state 13bubaji Maharashtra asütsü.

Khristan lenirtemi, anti conversion ozüng ya missionary tem aser yimtsüngtem nung mission mapatem nokdangtsü atema amshir, ta ashi.

Maharashtra state Minister of Fisheries, Nitesh Rane-i, iba ozüng ya Hindu tsürtem kangshia kiyimdaksüba sülen tanga yimsü dangi meyipdaksüba nokdangtsü atema lir, ta shiogo.

Bombay nung Auxiliary

Bishop, Savio Fernandes-i, "Iba ozüng ya kangshia mesüra mesüzüka yimsü meyipdaksüba nokdangtsü atema lir, aser ibajibo atangji loktiliba nung tebilemtsü onük ka lir. Iba atemajibo tang aliba ozüngtem ajanga nokdangtsü akok. Ajisüaka iba ama ozüng tasen ka benokba ya tim masüba nung amshitsü akok," ta ashi.

Journalist aser meimchir temeden atema inyaker John Dayal-i, tanga state tem nung aliba anti conversion ozüngtem anema Supreme Court nung ken o benoka lir, ta metetdaksü.

"Maharashtra State Bill ya agizüka ozüng kümra onoki yimjak nung iba ozüng anema nokdaksü aser court nunga ken o benoktsü," ta pai metetdaksü.

Paisa, iba ya alima nung democracy tulutiba linük nung nüburtem tsüngda telemsa adokdaksütsü atema lir; iba denji külemi India temzüng kübok sensotem nem agütsüba temeden anema lir, ta metetdaksü.

March 11, 2026 nü Mumbai nung aliba Bombay Catholic Sabha (council)-ia, "Iba bill nung tashishitsütem lir. Nüburtem den mejembitepi iba Bill benokba ya miimshia inyakba mapa ka lir," ta metetdaksü.

Lokti tentet 30-i Arogo sangdongji pusema sign süogo.

## ANOGO ABEN TSÜNGREM DEN

### Pa zü nung shidok

"Aser temulung lemtetba kuli, tasürtem nungi tamasa asoba, aser alima chubatem madak yimsüsüba Yisu Khrista nungi, nenok dangi taochi aser tesünep sang. Shibai asenok meimer aser Pei zü agi asen menen nungi asenok sala"

**J. Adok 1:5.**

Idaki tamaren o asem agüja lir. Yisu Khristai dang ochi teti ashi, kechiaser Pa ochi lir. Paji tamang katetba kuli lir. Pa bang nungi adokba o ajak ochi liasü, aser Israel tanishirtemi Pa atema ya dang shitet, "Shingai iba nisungi jembiba ama mejembi." Pa tebang nungi adokba otem ajak ochi, taitüsüba süang, mesüra aria bilemba, tesashi mesüra ain, arütsüba mesüra tepela, ozüng mesüra temeim ajak ochi liasü.

Paji joko masütsü shia arur rongnung mezüngbuba liasü. Pai sentsüwangshi taküm sayu. Shingai majangshiba taküm ka Pai agi. Pa takümüji tamanger ajaki lemsatepba taküm ka lir. Tanaben Pa kodanga asüyimi maotsü. Kodanga masütsüsa Pa ken sür shia aru. Tasübai joko Pa madak aser asenok madak yimsü masütsü. Pa tasüba sangi joko tanaben maputsü aser Yisu Khristaji Chubatem madak Chuba aser Kiburtem madak Kibuba asütsü. Pa Yihuda nunger chuba aser Dawid menden nung amentsü. Shingai Pa matsüngdoktsü. Iba ama uluba kati "Kü dang meim aser Pa sasa taküm agütsü". Shirnoki temenen nangzüker parnok menen ajak Pai tenlaba azü agi shidoktsür.

Asenoki Oba, sentsüwangshi temeim rateta sayuba asoshi Ne tenüng asanger. Onoki Pa tushir aser külemer ta shidi.

## Ethiopia nung ACTEA küm 50 ajungba among

**Bishoftu (Ethiopia), March 15 (Agencies):** Africa tesem ajaklen Arogo kanga ainba aser Arogo nung nütsüng kanga arenba ajanga Theology azüngertem nübo aika nungdaka aliba mapang nung Association for Christian Theological Education in Africa (ACTEA) küm 50 jungogo.

ACTEA küm 50 ajungbamong nung Africa tesem balala nungi theological tesayurtem adenshia tongtöbang onük aika lemtepogo.

Africa nung Arogo nung kanga ainer, anungji leadership training kanga nungdaka kümogo, ta parnoki bangjem.

Association for Christian Theological Education in Africa (ACTEA) küm 50 ajungbamong ya tan hopta Bishoftu, Ethiopia nung among. General Assembly nungji theological tesayurtem aser Africa tesem balala nungi Khristan lenirtemi Arogo nung lenirtem aika adokdaksütsü atema training agütsütsü nungdakba atema jembi.

"Future Ready, Mission Faithful" omen nung ayongzükba senden nungji linük 31 nung aliba theological institutions nungi züngsemtem aika aden. Iba senden nung shilem agirtem rongnung Association of Evangelicals in Africa, seminaries, universities aser Bible colleges nungi aika densema liasü.

O jembirtemi Africa nung theological shisaliok dak sendakba nung tayongzükba balala ajangshiba aser tanü putu den apet lenirtem nem tesayuba agütsütsü nungdakba metetdaksüba den külemi

Africa nung maneni Arogo nung renloktsü atema ayongzük.

Tamalen Christian Daily International den interview ka nung jembidang ACTEA Executive Director Dr. David Tarus-i, Africa nung pastor tem aika theological training magirtem lir, ta metetdakja liasü.

Tarus-i, "Africa nung Arogo kanga ainer saka iba denji liromedema theological education bo mainer," ta metetdakja liasü.

1976 küm ACTEA ya Association of Evangelicals in Africa kübok theological education commission indang project ka ama tenzüka liasü.

ACTEA-i theological education tashi itdaksütsü atema evangelical universities, seminaries aser Bible colleges yaria arudar.

ACTEA küm 50 ajungbamong nung Association of Evangelicals in Africa executive Board züngsemtem-a aden; parnok rongnung Rev. Dr. Jean Libom Li Likeng, Archbishop John Praise Daniel aser Dr. Master Matlhaope nunger densema liasü.

Alima nung Khristan nütsüng teimba aliba region ji Africa kümogo; tang Africa nung Khristan nütsüng million 697 lir.

Akhidang nungi Khristan nütsüng teimba aliba region ji Europe liasü ajisüaka tangbo Khristan nütsüng teimba aliba region ji Africa kümogo. Europe nung Khristan nütsüng million 505 dang kümogo aser North America nunga Khristan nütsüng million 238 dang kümogo.

Africa nungbo tang Khristan nütsüng million 697 lir.



Dimapur, Mar. 15 : DABA CEM Duncan Fellowship-i ayongzükba Theme Sunday "Tekumtet" omen nung ajemdaker among aser iba sendong nung Mrs. Tiala Asso. Pastor CEM Aoyimti Baptist Arogo nungi arua tanurtem den tesayuba aser sarasadem agüja liasü. Tekümtetji asen-i inyakba mapa tajung agi masü saka Yisu Khrista nungi dang angur ta lai lemsatep-a liasü. Tekümtet angur asoshi teti tatem makaba taküm kotak nung aser tekümtet makar asoshi teti molumi shilem lir ta lai sayu. Tekümtet tejangja angütsü asoshi Rom 10:9-10 dak ajemdaker taküm shia-i pei menen tebang agi nangzükba den Yisuji Khrista aser Tsüngrem-i Pa tasü nungi shia arudaksü ta temulung ajak agi amangba ajanga angur ta lai sayu. Tekümtetji teti asoshi anungji koda tekaraba nung iba tekümtet angur yamaji asentakum nung-a iba sungjangtem tang-a anogoshia Yisu den tesendaktep tajungba aser takangba akumer ta shia lai tanurtem ajak asoshi sarasadem tajung agüja iba sendong tempang.

AO OSHI ANGAZÜKDAK:

TANÜ ANGAZÜKTSÜBA OJANG



Wajem

(adj) junga makong, tajema masü takonga masü (half dried)

\* Ak shi wajem nung esü enoka asoba aon junga achir.

Waju

(n) au agi taju yangluba (bamboo spike)

\* Akhi lepteptsüngtepba putu nung arür yirudaktsüsü atema yim tezülen waju songasa yutsü.

OLONG PAITEP # 7445

Grid for OLONG PAITEP # 7445 with numbers 1-16 in various cells.

TIPLÉN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A\_\_\_g
6. Mopung apodoka
9. Tongtipang tagitsü
10. Menungra bilem
11. Aiür
13. S\_\_\_k
14. T\_\_\_r

OLONG PAITEP # 7444 TELANGZÜBA

TIPLÉN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



Union Health Ministry kübok National Board of Examinations in Medical Sciences (NBEMS) ajanga "Artificial Intelligence in Healthcare lesson live stream on YouTube" otsü tasen ka yangluogo.

Iba otsü ya Artificial Intelligence in Healthcare atema linük ajungalen online training programme agiba ajanga yangluogo ta Union Health Ministry-i metetdaksü.

Guinness World Records-i iba naroküm agütsüba ya record ka dang masü saka India-i medical education nung digital innovation maparen inyakba indang kuli lir ta NBEMS President Dr Abhijat Sheth-i ashi.

Aizawl nung Chapchar Kut 2026 kanga junga tembangogo



Aizawl, March 15, 2026

(Agencies): Aizawl kübok Lammual ground nung Mizo nungeri Chapchar Kut kanga meraketa mungogo.

"Zo nun ze mawi - Inremna" (Mizo Ethics - Reconciliation) omen nung ajemdaker Mizoram nung tongtipangba aser tulutiba benjung mungogo. Hopta piyong munga aruba benjung Hokolbarnü tembang.

Iba sentong nung Governor VK Singh aser Art and Culture Minister C. Lalsawivunga na aden aser Chief Minister Lalduhoma-i "Kut Pa" (Father of the festival) ama shilem agia liasü.

"Chichiba putepshibaji tebilemstü khuret abentsü temulungtetba nung tera yanga lir. Asenoki tamakok anguba, tangar dak tai tongloktsüba toktsür ni tai, iba yak ü tebilemstü ta nangzükba ajanga loktiliba nung taneptsü aser yimjung bentsür arur" ta Chief Minister Lalduhoma-i ashi.

"Iba Kut ajanga asenoki tenüng agitsü tasü itshitsü ayongzük" ta paisa ashi.

Mizo nunger alemlü nungi benschia aruba sobaliba aser tanü political tangatetba kanga meputep lir ta Lalduhoma-isa ashi.

Paisa lanurtem aser sensotem dang digital sabangtem nung kümdangtsü ayongzük.

Social media nung meputep adoktsüsa prokshiba aser political lungkak aitba nung "effigy" yanglur rongdokba ya Mizo nunger sobaliba den meputep ta CM Lalduhoma-isa metetdaksü.

"Asen oboula nungeri council of elders den meputep adokdang 'Chalrem' aser 'Saiutan' (traditional conflict resolution) benshi. Asenoki ketdangsubaren takdang nung o atsüteptsü akok saka session tembangba sülen kin ka ama külemi amentsüla" ta paisa ashi.

March 9 nungi tenzüka hopta piyong benjung munga arudang handloom, textile, & handicraft exhibitions; food processing demonstrations, food courts; flower shows; living museum (live demonstration of traditional Mizo life); photo & painting exhibitions aser Chapchar Kut film show liasü.

Chapchar Kut ya kümshia March ita amunger aser iba ya tekong lu ayimtsü atema mapa inyakba aser rongdokba sülen amunger.

Chapchar Kut ya 1450 aser 1700 A.D tsüngda Myanmar den anasa aliba Suaipui yimtsüng nung tenzük ta putiotsü bushirtemi ashir.

1890s tatemlen English missionary tem Mizoram-i arudang parnoki iba benjung ya Khristan tesayuba den meputep ta ser anendakja liasü. Ajisüaka 1973 küm iba benjung ya ano amungtsü tenzük saka shiruru amshiba aser yi ajemba medeni amungtsü tenzüka liasü.

Noney district nung tanur ka pokset; tebu yiru

Imphal, March 15, 2026

(Agencies): Manipur kübok Noney district nung bomb ka apokdang arishi küm 3 tanur ka pokset aser tebu yiru.

Noney district kübok Taolingpung yimtsüng nung

Honibarnep 8:30 ako meta tebu o tanur na kima merükdang iba lendong atalok.

Iba mapang bomb tesashi ka apok aser idangjisa tanur pokset aser tebu yiru. Lendong atalokba sülen tebuji Khoupum Primary

Health Centre, Noney nung anepalu aser iba sülen RIMS Hospital, Imphal-i anir ogo.

Iba tatalokba sülen police aser bomb experts tesem tonga ao aser bushisüngdang tenzükogo.

Arunachal CM office nung Jompi Ete-i yangluba artwork ayur



Itanagar, Mar 15, 2026

(Agencies): Arunachal Pradesh kübok Niti Vihar nung Chief Minister indang Office nung "Fragments of Identity (An Indigenous Visual Narrative)" ta ser süng agi chitetba noksa ka yua lir.

Iba feet 20 woodcut artwork ya artist Ms Jompi Ete-i

yangluba lir aser iba ajanga Arunachal Pradesh nung lisapur senmang nem tetushi agütsür.

Iba artwork nung Arunachal Pradesh indang motifs, patterns, sacred animals, aser cultural symbols enoka lir aser state nung lisapur sobaliba aika temeyoktep benjunger.

Chief Minister Pema Khandu-i iba indang noksa social media nung prokshio go aser tetushi agütsügo.

Iba artwork ya Ministry of Culture, Ministry of Development of North Eastern Region (MDoNER), aser Ministry of Women and Child Development-ia lemsatepogo.

# Kenya tzümetzüng lendong nung nisung 62 süogo



**Nairobi, Metsüremi/March 15 (Agencies):** Taoba hopta tsüingda Kenya nung tzüinglu kanga sashia aruba sülen tzümetzüng lendong nung nisung 62 süogo, ta ketdangsürtemi metetdaksü. Hopta ka tejakdang tzümetzüng lendong nung nisung 42 asüba sangdonger liasü. Manger mesangwa tsüingda minibus taxi ka nungi nisung 11 kümzükogo. Linük yimtiba nung tzü metsünga atuba mapang iba taxi ya asonger liasü, ta Kenya Red Cross-i ashiba den ano tanur ana tzü agi metsünger aliba ki ka nungi kümzükogo, ta metetdaksü. Taoba hopta nungi tzüinglu kanga sashia aruba ajanga küm aika tsüingda linük tang tzümetzüng agi tamajungtiba kongshir lir. Ayongtem moshi ayim tenzükogo aser iba ajanga

kitem metsünga den lenmang, power aser tzü supply line tem raksatsüogo. Nairobi nung aputem raksaba sülen lenmang karbo shibangatokogo aser Honibarnü tzüinglu kanga sashia aruba sülen school-a karbo metsüngogo. Interior Ministry-i Deobarnü sangdong ka ajanga ashiba agi, linük kübok tesem balala nung maneni tzüinglu kanga sashia arudar aser iba ajanga tzümetzü adokdaksütsü ana nung lir. Ketdangsürtemi lenden nung alirtem dang tekümzükba tesem bushia aotsü mepeshia metetdaksüogo, aser nisung 2000 dak tema pei ki toktsür tekümzükba tesem bushia aotsüsa kümogo. Police-i ashiba agi, tzüinglung kanga sashia aruba ajanga linük kübok tesem

balala nung tzümetzüng adokdaksüba sülen tekümzükba maparen maneni benoka inyakdar. Asürtem ya tesadang (33) dak timba Nairobi nung asüba lir, kong kilentsü majungba ajanga tzümetzü adokdaksür aser iba den terenlok maparen balala ajanga ayong ayimba nung tetsüdaksü adokdaksüba ajanga timtem bener arutsür. Tir William Ruto-i Deobarnü ashiba agi, lendong agi kongshir alirtem nem chiyongtsü aser medical teyari agütsütsü. Paisa, ketdangsürtemi kilentsü nokdang alibatem merektedar ta ashi. Tzümetzüng yagi Kenya dang masü saka kidanger Ethiopia-a kongshiogo, kong tzümetzüng aser anentsüh lendong nung nisung 100 dak tema süogo.

# Rara tembangtsü mera ajak pela agizüksü: Abbas Araghchi



Abbas Araghchi

**Tehran, Metsüremi/March 15 (Agencies):** Rara tembangtsü asoshi mera agiba ajak Tehran-i pelashishia agizüksü, ta Iran Foreign Minister Abbas Araghchi-i Deobarnü ashi. "Rara jungjunga tembangtsüsa mera agiba Tehran-i pelashishia agizüksü," ta Araghchi-i ashi. West Asia rara tenzük hopta asembuba nung ayaoka aiba mapang aser United States aser Israel dang telangzüba agüja Iran-i yimya balala nung amokmerenba anogo ka nung Araghchi-i iba sangdong ya agütsü. Kasa anogo Iran indang

Revolutionary Guards temi Israel Ato Kilonser Benjamin Netanyahu dak tenük yoktsü nangzüka liasü. "Tanurtem tepsetba nisung tamajung ya takum lira, onoki tashi ajak amshia maneni bushia tepsettsü," ta parnok indang website Sepah News nung ashi. Iran-i ano maneni US nem telangzüba agütsütsü nangzük, kechiaser Tir Donald Trump-i ano Kharg Island amaktsü amokmeren, koba Iran indang totzü bendang lima dagi yokba tesem tongtipang ka lir. Kuli jecha makai Washington-i United Arab Emirates nungi iba tesem amak ta Tehran-i tai tonglokja lir. Islamic Republic-isa US-i "Lucas" ta nungja agütsüshir Shahed-136 drone amshia tiazü amak ta aitsü. Ajisüaka parnoki region nung civilian ki o jen amakba bushisüngdangba nung yariteptsü renema lir ta ashi saka Turkey. Kuwait aser Iraq ama kidanger linük nung amakba kar nung temulung malemba lemsatepa liasü. Iran tenüng amshitsü mechi asaa parnoki item drones ya amshi ta ketdangsür temi tai tongloktsü. Araghchi-ia Iran

bendanger den tesendaktep raksatsütsü asoshi Israel-i srone amshia Azerbaijan amak ta ashi aser Iran indang ambassador to Saudi Arabia, Alireza Enayati-ia Riyadh nung aliba US embassy amakba nung shilem agia mali ta ashi. Kasa mapang Gulf linüktemi Deobarnü missile aser drone amshia amakba sangdonga lir. Bahrain, Saudi Arabia aser UAE linüktemi nüburtem dang projectiles aruba khazüka yoktsü inyaktepar ta ashi aser anogo ka tejakdang Iran-i UAE ports tongtipang asem nungi ainshitsü amokmerena liasü. US mitkartem aliba UAE aser danga Gulf linüktemi Iran amaktsü atema par ali aser airspace mamshidaksür ta ashir. Israel aser US nati February 28 nü nungi tenzüka Iran amakdang parnoki nuclear aser military sites amaker ta ashi aser Iran nüburtem dang par lenir anema nokdaksü ajungmesoa liasü. Iba mapang Supreme Leader Ayatollah Ali Khamenei tepset aser Iran-i telangzüba agüja Israel aser kidanger Gulf linüktem amak.

# Iran-i Israel PM Netanyahu tepsettsü nangzük

**Tehran, Metsüremi/March 15 (Agencies):** West Asia nung rara tesashiba akumba mapang Iran indang Islamic Revolutionary Guard Corps (IRGC)-i meneni Israel Ato Kilonser Benjamin Netanyahu bushia tepsettsü nangzük aser "takum alinungbo" tenük yoktsü ta ashi. IRGC ajanga sangdong ka nung Netanyahu ya "criminal Zionist Prime Minister" ka lir ta ashi aser pa takum lira maneni bushia tepsettsü merangtsü ta ashi. "Mapa tamajung inyaker aser tanur tepseter Netanyahu takum lira, onoki maneni pa arishitsü," ta ashi. 52 buba Operation True Promise 4 nung shilem ka ama iba osang ya sangdong, kong parnoki region nung Israel nung aser US mitkar alidak tenük yoker ama ta ashi. Sangdong ajanga ashiba agi, Iran sepaitemi Tel Aviv nung industrial areas nung missiles tesashi khaloktsü aser iba mapang asü-amaba liasü aser yimti ajunga nung ambulance sirens ola agütsü. IRGC-isa Erbil nung Al-

Harir Air Base aser Kuwait nung Ali Al Salem Air Base aser Camp Arifjan densema US sepaitem den sendaktepa aliba tesemtem nung missiles aser drones amshia amak ta ashi. Iran sepaitemi Netanyahu tia mejangja aser pa tepseter alitsü akok mesüra Israel nungi par kibong den jena orr alitsü akok ta ashi. Ajisüaka social media nung Israel ato kilonser tepsetogo ta osang prokshiba Netanyahu indang office-i tiazü ta ashi. Turkey nung aliba Anadolu Agency ajanga iba osang indang asüngdangba mapang Prime Minister's Office-i khenyongi tai ta ashi. "Item ya osang taila lir; Ato Kilonser junga lir," ta office ajanga ashi. X nung Netanyahu indang account nung video ka lemsatepba nung pa indang teka nung temeyong talila ka ajitet aser iba yongji social media amshirtemi iba clip ya AI ajanga yangluba mesüra deepfake asütsü ta jembi tenzük. Netanyahu-i March 13 nü tesüsa video ka post asüba nung Israel-i Iran aser Hezbollah madak takok agur ta shia liasü.

# Vietnam election nung candidates shilem 93 bo Communist Party nungi lir



Vietnam National Assembly election nung neburtemi vote agütsüba noksa nung angur.

**Hanoi, Metsüremi/March 15 (Agencies):** Vietnam nung voter temi linük nung legislative body tematiba National Assembly atema vote agütsüogo. Deobarnü election nung parliamentary candidate 864 nungi shilem 93 bo Communist Party züngsem tem lir aser candidate shilem 7.5 independent lir, ta national election council-i metetdaksü. Küm pongu nung khen agiba election ajanga voter million 73 dak temai National Assembly züngsem 500 aser local council atema representative tem shimtsü. Communist Party, kobai nütsünyongsük milliobn 100 aliba Southeast Asian linük ya küm aika yimsüsüa arudar, parnoki parliament nung menden shilem 97 azioka lir. Voter temi parnok representative temi Vietnam maneni renloka anir aotsü imlaba lemsatepogo. Vietnam

nung tang lenir Lam lenisüba nung rongsenketzüng nung temelenshi tulu bener aruba mapang ka lir. Election result ya March 23 nü sangdongtsü imlar, ta parliament Chairman Tran Thanh Man-i local media dang ashi. National Assembly ya April ita tetezüklen lapoktsü aser iba mapang ozüng yanglurtemi tir aser Ato Kilonser densema party-i taoba mapang nominate sür aliba tongtibang lenirtem agizüksü imlar. January ita party-i Lam ya maneni parnok indang general secretary asütsü ta nenshia metetdaksüogo, koba Vietnam nung tashi taittiba menden lir. Kasa senden nung Politburo indang züngsem 19 shima liasü. Deobarnü Hanoi nung vote agütsüba sülen Lam-i ashiba agi, linük maneni renloka odaktsütsü atema lenirtem shimtsü asoshi iba election agir.

# GHS Kandinu asayamung takok ngua asayaogo



**Kohima, Metsüremi/March 15 (TYO):** Government High School (GHS), Kandinu Annual Sports Meet 2026 March 11 nungi 13 tashi kanga takok ngua asayaogo. Asayamung nung Rising People's Party (RPP), Nagaland tir Joel Naga alakteta jaoker liasü.

Sentong nung ojembiba mapang Joel-i, kaketshirtemi kanga jangrabangra shilem agiba atema parnok nem tenüngsang agütsü aser wadang ajak nung temaba jenjang atongtsü atema meranga inyaksü ajungshia liasü.

Paisa, kaketshirtem dang pei sempet jangjatsü aser nukjidong makai talangka zünga aotsü melena item sempettem takok tashi amshitsü ajungshi.

Paisa, kaket shisatsü bushiba nung takok tajung ngua aoertem dang medicine, engineering aser civil services amala nung career yanglutsü ajungshi.

Asayamung mapang kaketshirtem football, volleyball, running races, high jump, long jump, javelin throw aser tug of war amala asaya balala asayaba den pre-primary aser primary kaketshirtem atema-a asaya balala ayongzüka

asayadakja liasü.

Asayamung lapokba sentong ya Tezen aser K. Haiya lenisüba nung agi, Tsonsa Baptist Church pastor Nitilo-i Tsüngrem temaotsü meshizüka sarasadem aser Assistant Headmaster Thongsenlo-i lokti pela agizükba o jembia liasü.

Asayamung ya Kenathong Kath, PET-i ketdangsüa asayaogo. Asayamung shibangba sentong Benkiya Apon lenisüba nung agi aser Kelvin Tep-i achaayanga sempet alemba sentong agi.

Taküm Overall Champion ji Red House liasü.

# Iraq team World Cup Playoff atema Mexico-i aotsü

**Metsüremi/March 15, 2026 (Agencies):** Middle East nung tang rara adoker aliba ajanga asaya thinentüsü asoshi mepeshiba sülen Iraq team 2026 World Cup playoff asaya atema Mexico-i aotsü, ta linük football association-i metetdaksü.

"National team hopta tatem private plane ka nung Mexico-i aotsü," ta Iraq football association tir Adnan Dirjal-i ashi. Paisa, parnok temeket nung mepetmesü adoker tayimtsü senzüsenpong mejungi aliba mapang parnoki FIFA dang teyari meshia liasü, ta ashi.

"Onoki onok professional asayartem asaya aliba club tem kar den parnok national team nungi asayadaksütsü atema

tongtepratepogo," ta paisa shisem.

Iraq team intercontinental playoff final nung Suriname mesüra Bolivia den March 31 nü Mexico kübok Monterrey yimti nung asayatsü lir.

Iba asaya akokba team ya Group I nung adentsü aser parnok taküm World Cup mezüngbuba round nung France, Senegal, aser Norway den asayatsü, koba United States, Canada, aser Mexico nung ayongzüka asayatsü lir.

US aser Israel nati February 28 nü nungi Iran amak tenzükba sülen taküm iba asayamung nung Iran asayatsü masayatsü mejangjai kümogo.

FIFA tekolakba Gianni Infantino-i Iran team iba

asayamung nung shilem agitsü atema pelashishia jaoktsü ta shiaka US tir Donald Trump-i Brehostibarnü sangdong ka ajanga, US nung Iran team taküm lendongbang nung alitsü ta tekümdangtsü metetdakja liasü.

Maneni iba rara ajanga senzüsenpong nung tetsüdaksü adokba sülen Iraq-a shilem agitetsü magitetsü mejangjai akümba sülen team manager-i FIFA dang parnok indang playoff asaya thinentüsü mepeshia liasü.

Iraq indang head coach, Graham Arnold-i ashiba agi, tang mangatettep adoker aliba ajanga asayar aser technical staff tem aika Middle East nung taolen makai sabanger lir.

# Indian Wells: Medvedev-i Alcaraz tsükdaktsüogo

**Metsüremi/March 15, 2026 (Agencies):** Indian Wells Open tebur kija asaya nung Daniil Medvedev-i top-seeded Carlos Alcaraz tsükdaktsüogo. Alcaraz taküm iba asaya nung mezüngbuba tamakok nguogo.

11th-seeded Medvedev ya Honibarnü semifinal asaya nung 6-3, 7-6 (3) agi Alcaraz kokogo aser pa final nung second-seeded Jannik Sinner den asayatsü, shibai Alexander Zverev 6-2, 6-4 agi koka liasü.

Alcaraz-i taküm asaya 16 atonga koker liasü, kong Australian Open aser Qatar Open akokba densema liasü, ajisüaka iba asayamung nunga Alcaraz aser Sinner na final asayatsü aliba nokdangogo.

Medvedev-i taoba asaya pezü tashi nung Alcaraz mekoki liasü, kong 2024 küm Indian Wells final makokba densema lir. 2023 küm US Open semifinals sülen Medvedev-i tang mezüngbuba Alcaraz kokogo.

Russia nunger asayar ya

February 28 nü Dubai Tennis Championship akokba sülen United Arab Emirates nung anogo asem tashi rara adokba ajang meyipa ao mejungi sabanga liasü.

Tayimtsü senzüsenpong nung tetsükdaktsü adokba sülen pa anogo ana tashi Dubai toktsür motet aser iba ajanga Medvedev iba asayamung nung asayatetsü masayatetsü mejangjai liasü.

Arishi küm 30 tain asayar ya Andrey Rublev aser Karen Khachanov na den tasemnübuba nung Oman-i or apusoa oteta liasü. Oman nungi parnok Istanbul-i ao aser Indian Wells tenzüktsü anogo ana lia US atong.

Kasa mapang nung Sinner-ia tanga semifinal ka nung Germany nunger asayar Zverev ghonda ka ser minute 23 asayar kokogo. Asaya nung Sinner-i ace trok oteta liasü.

Zverev-i mezüngbuba point ti ya serve ajanga dang angu. Ajisüaka Sinner-i game pongu aser tenetbuba nung Zverev

indang serve break süa mezüngbuba set akok.

Medvedev aser Sinner napronglai taküm iba asayamung nung set ka nung danga tamakok ngua mali. Sinner-i taoba asaya asem nungbo Medvedev koker lir, kong 2024 küm US Open quarterfinals densema lir.

Kasa asayamung tetsür tarep asaya final nung Taylor Townsend aser Katerina Siniakova nati Anna Danilina aser Aleksandra Krunic na 7-6 (4), 6-4 agi kokogo. Townsend asoshi iba ya mezüngbuba aser Siniakova asoshi tanabenbuba Indian Wells akokba lir.

Tebur tarep asaya final nung Guido Andreozzi aser Manuel Guinard nati 7-6 (3), 6-3 agi Arthur Rinderknech aser Valentin Vacherot na kokogo. Tarep temeyoktep asaya nung Belinda Bencic aser Flavio Cobolli nati top-seeded Gabriela Dabrowski aser Lloyd Glasspool na 6-3, 2-6, 10-7 agi koka liasü.

# Chumoukedima atema KIC table tennis trials March 21 nü agitsü

**Chümoakedima, Metsüremi/March 15 (TYO):** Khelo India Centre NIAPA-i ayongzüka Under-14 (U-14) Table Tennis selection trial (tetsür aser tebur) ka March 21 nü 4 mile Agri Expo, Chümoukedima kübok Northeast India Academy of Performing Arts (NIAPA) office nung nikongtsütsü 4 ako nungi tenzüka agitsü, ta metetdaksüogo.

Centre nungi sangdong ka ajanga ashiba agi, Chümoukedima district nungi sempet aketba lanur asayartem bushiteta parnok nem training agütsütsü aser parnok ya district jenjang nung table tennis asayamung balala nung toktepdaktsütsü nukjidong nung iba selection trial ya ayongzüka agir.

U-14 age category nung aliba lanur asayartem dang iba trail nung shilem agia parnok

sempet sayutsü ayongzüko. Lanur asayartem nem academy indang training programme tem ajanga structured coaching agizüktsü maongka agüja District nung table tennis asaya grassroots jenjang nungi ajungkettsü nukjidong nung iba inyakyim benokogo.

Kasa mapang nung tsürapur aser guardian tem dang asayatsü jangraba tanurtem trail agitsüba anogo mapang matong tsüngda tenüng züngoksemtsü atema anir arutsü metetdaksüogo. Iba trail nung shilem agitsü atema osang tejangjaba agitsü asoshi Coach Metevito Kintso; 9233722116

den t o n g t e p r a t e p t s ü metetdaksüogo.

KIC tem ya Grassroots-level sports infrastructure tem akangshitsü atema district level nung amenoka lir.

# Sarfaraz Ahmed cricket asaya nungi anisüngzüker



**Metsüremi/March 15, 2026 (Agencies):** Taoba Pakistan captain Sarfaraz Ahmed-i Deobarnü sangdong ka ajanga pa cricket asaya format ajak nungi anisüngzüker metetdaksüogo.

Pa linük team nungi mapang talangka asayaogo aser pa lenisüba nung ICC asayamung tongtibang final ana nung India koka liasü.

Wicketkeeper-batter shiba Pakistan tenüng nungi tatemsa Australia national cricket team den 2023 küm Perth nung Test ka asaya liasü, pai asaya nungi anisüngzüksü telemtetba agiba ya Pakistan Cricket Board (PCB)-i sangdong ka ajanga metetdakja liasü.

Pakistan Cricket Board (PCB) yongtsüng nung source temi ashiba agi, pa asaya nungi anisüngzüker sangdongba ajanga Sarfaraz ya national Test team indang head coach asütsü asoshi shimtsü atema lenmang lapoktsütsü.

PCB-i Azhar Mahmood mapa nungi anentsüba sülen Test team coach ka maka arudar. Azhar ya taoba küm Test team interim head coach asütsü shima liasü.

Sarfaraz, shiba May ita arishi küm 39 ajungtsü, pa nem Pakistan cricket structure nung khuret agika nongloktsüogo. Tawa pa ya national selection committee züngsem kümdaktsü aser Pakistan Under-19 aser Shaheens squads mentor aser manager asütsü shima liasü.

Career tatembang ka dangi aruaka Karachi nung asoba asayar ya domestic cricket nung maneni asaya arudar aser taoba küm October ita first-class match ka nunga asayaogo. Ajisüaka pai ashiba agi, pa asaya nung masü saka ketdangsuba aser asayartem anitetba mapa nung rangloker inyaker.

"Ni format asemprongla nung Pakistan captain akümtsü aser 2006 ICC U-19 World Cup aser 2017 küm Champions Trophy akoktsü kodanga mebilemi liasü.. Item ya amatoktsü makokba mapangtem lir," ta pai ashi.

Wicketkeeper-batter ka ama pa Pakistan team nungi Test 54, One-Day Internationals 117 aser T20 Internationals 61 nung asayaogo. Pa lenisüba nung linük team ya format asemprongla nung asaya 100 asayaogo.

**BILEMDANGANG**  
"Temulung timdangeri tindang o jembir."